



**B**wana, Mungu wako, atakuondokeshea nabii miongoni mwa ndugu zako kama nilivyo mimi; msikilizeni yeye.—**Kumbukumbu la Torati 18:15.**

Matumaini ya Israeli yalijumuishwa katika ahadi iliyofanywa wakati wa wito wa Ibrahimu, na baadaye ikarudiwa tena na tena kwa uzao wake, “katika wewe jamaa zote za dunia watabarikiwa” (Mwanzo 12:3). Kadiri kusudio la Mungu kwa ajili ya ukombozi wa jamii ya kibinadamu lilivyokuwa likifunuliwa kwa Ibrahimu, ndivyo Jua la Haki lilivyong’aa moyoni mwake, na giza lake likapotea. Na pale, hatimaye, Mwokozi Mwenyewe alipotembea na kunena kati ya watu, alishuhudia kwa Wayahudi kuhusu tumaini angavu la mzee yule wa imani la ukombozi kupitia kwa Mkombozi. “Ibrahimu, baba yenu, alishangilia kwa vile atakavyoiona siku yangu” Yesu alisema; “naye akaiona, akafurahi” (Yohana 8:56).

Tumaini hilo hilo lenye baraka lilitangulia kuoneshwa katika ombi la mwisho la baraka lililotamkwa na mzee wa imani Yakobo alipokaribia kufa, alipowatatamia wana wa Yuda...

Kupitia kwa Musa, kusudio la Mungu la kumtuma Mwana Wake kama Mkombozi wa jamii ya wanadamu iliyoanguka liliwekwa mbele ya Israeli. Kwenye tukio moja, muda mfupi kabla ya kifo chake, Musa alisema “Bwana, Mungu wako, atakuondokeshea nabii miongoni mwa ndugu zako kama nilivyo mimi; msikilizeni yeye.” Ni kwa namna iliyo wazi kabisa, Musa alikuwa ameelekezwa kwa ajili ya Israeli kuhusu kazi ya Masihi aliyekuwa anakuja. “Mimi nitawaondokeshea nabii miongoni mwa ndugu zao mfano wako wewe” lilikuwa ndilo neno la Yehova kwa mtumishi Wake; “nami nitatia maneno yangu kinywani mwake, naye atawaambia yote nitakayomwamuru” (Kumbukumbu la Torati 18:15, 18) (Prophets and Kings, 683, 684).

Takribani siku 40 baada ya kuzaliwa kwa Kristo, Yusufu na Mariamu walimpeleka Yerusalemu, kumwasilisha kwa Bwana, na kutoa kafara....

Kuhani mhusika alifanya ibada kama wajibu wake. Alimtwaa mtoto mikononi mwake, na kumuinua juu mbele ya madhabahu. Baada ya kumrejesha kwa mama yake, aliandika jina “Yesu” kwenye orodha ya mzaliwa wa kwanza. Hakuweza kudhani, mtoto yule alipokuwa mikononi mwake, kwamba huyu alikuwa yule Mkuu wa mbinguni, Mfalme wa utukufu. Kuhani hakuwa na wazo kwamba mtoto huyu mchanga alikuwa Ndiye Musa aliyeandika kumhusu, “Bwana Mungu wenu atawainulieni nabii, katika ndugu zenu, kama mimi; msikieni yeye katika mambo yote atakayonena nanyi” (Mdo. 3:22). Hakudhani kwamba mtoto huyu mchanga alikuwa Ndiye ambaye Musa alikuwa ameomba kuona utukufu Wake. Lakini Yeye aliyekuwa mkuu zaidi ya Musa alikuwa mikononi mwa kuhani; na alipoliandika jina la mtoto, alikuwa akiweka kwenye orodha jina lake Yeye ambaye alikuwa Ndiye msingi wa utamaduni wote wa Kiyahudi (The Desire of Ages, 50-52).